

東游日錄

完

249  
113

東游日錄

小杉屋寄贈本

大正  
2  
寄贈

例言

一是書。我復堂先生壯歲所著。今請鋟之梨。以公同好。

一重野成齋博士。清國王漆園翁。各有批點。以行間狹隘。故不復別之。

一評在欄外。不署名氏者。係成齋博士所附。

一信鹿鹿少暇。不能專正魯魚。先生令嗣和亭君。爲參訂。得以竣事。

明治四十五年六月

玉井 信識

富嶽晃山巾月游紀序

余嘗謂。人生世間。得遍遊名山。固士之幸也。而亦卽山之幸。然其間有緣存焉。西蜀峨嵋名勝甲於天下。唐杜少陵。天寶間。流落西川。足跡所經。輒多題詠。而獨未登峨嵋。宋蘇子瞻。本蜀人。登第後。遷謫。多在東南。亦未一登峨嵋。乃知名山與名士。必有夙緣。方許登覽否。則有相遇而終疎者矣。余今秋。重遊越中。翌日。小杉復堂君來訪。爲余二十年舊友。一見依然。追述前游。情景如昨。顧壯者老。老者衰。故交零落。君

殆魯靈光矣。談次出游紀一卷。囑爲點定。并索爲序。余披誦一過。知其遊在丁亥。迄今已將卅載。當時乘暑假作勝游。自飛信抵武藏。復由毛埜。經新斥而還。時經匝月。途歷千程。凡每日所涉所見。山邨水驛。霧宿霞餐。無不繪寫其形。而於富嶽晃山二遊。煙湖雪嶺。古刹殘碑。以及蹊逕之崎嶇。林泉之深邃。紀錄加詳。尤喜叙事簡潔。點景鮮妍。幾將化筆墨爲雲煙。恍如讀少陵草堂之詩。子瞻赤壁之賦。不禁令人神往乎。余憶曩時北游。道出信濃。曾泛棹富川。而芙蓉頂

上。未嘗一駐吟杖。晃山曾經一游。縱有吟咏。亦恨游之未暢。言之未詳。窃滋媿焉。茲得讀君遊紀。大足暢我胸懷。豁我眼界。何幸如之。而余因之有感焉。古來名山勝境。日夕往來。不知凡幾。而真能游賞者。千百中。實無一二。無論樵叟牧童。不知領畧。卽自謂好遊。嘖嘖稱羨者。亦多一過而名遂滅。此其人固有負於山。而山亦何取夫其遊。余故曰。名士之不獲登覽名山。固士之不幸。而名山之不獲名士賞詠。亦名山之不幸。使峨眉當日得少陵子瞻一游。當不知留多少

險篇矣。余今猶爲峨眉惜之。富嶽晃山何幸。得君一游一紀。足爲名山增色。山靈有知。當亦歎良緣之匪淺。余亦得附一序於紀末。與名山共此不朽。是則余之深幸也。不可謂非有緣也耶。時在

光緒乙巳秋九。漆園老人王治本譔時年七十一



東游日錄

越中 小榭熙敬止著

余性好游。爲塵事羈縛。不能如意。茲歲丁亥。夏小暇。因欲取路於飛信。游東京。歸途探日光山諸勝。以洩胸中磊砢。乃於七月十七日。治裝早發。黑田生彬從焉。至中野街。辭送客。遠近諸山。競秀躍出。南行四里。至篠津。有川橫前。卽神通上流。過橋脚尖漸仰。兩側峰巒相連。踰庵谷嶺。一水自南來。曰宮川。下合高原。川水勢噴怒。聲如雷。昔時此川以籠渡人。兩岸道路

甚險惡。大野介堂有詩云。岩石高如屋。奔流不受船。人從空裡度。籠向樹梢懸。讀此可以知其概矣。今川架板橋。道路開鑿。通車馬。再進。見隔川石壁百仞。曲折如屏障。青松丹蘿。上偃旁綴。景趣極佳。薄暮抵茂住宿焉。此地家家設數筒引泉。夜霽。霽有聲。疑爲大雨至也。

十八日。微雨。曉發。川上一村。竹樹陰森。翠色與川相映。幽雅可愛。稍進。高峰爭起。逕繞其半腹。陟降數里。度橋而南。山漸豁。夾川民居鱗次。此爲舟津驛。一都

會也。往年余游此。留數日。時有田鐵幹者。負氣豪放。喜文辭。每相與搜巖壑之奇。情事宛在目前。距今已一紀矣。路岐左右。右通高山。左出平湯。左折踰橋。俄然天曠。雷聲殷起。山谷欲裂。比抵田頃家。大雨傾盆。潦溢路上。深沒膝。行數町。岩壁亂立。溪水迅激。路斷爲淵。深不測。左顧崖上架獨木。黑田生趨捷。先進攀之。日晡宿。今見人家數十烟。風俗淳朴。男女皆穿袴。村婦夜集歌謠。音調明晰。不類尋常山間之人。十九日。昧旦。辭今見。水落。徃徃見流木礙石間。知昨

日大雨。行可二里。得平湯。村出溫泉。能瘥百病。赴集者甚多。攀一山。苔石錯落。老樹森立。樹皆輪囷。翠蘿挂枝。毵毵如髮。青田所云。度石苔蘚滑。披蘿烟靄濃者。殆是。行十數町。爲飛信界。狂峰絕巘。聳起于左右。陰風獵獵。逼人。樹間殘雪。堅如鐵石。余聞白骨有溫泉。將一浴之。踰數山。至檜茶屋。遇樵夫。始知路已誤。乃進抵大野川。投宿。

二十日。曉雨。開戶。見天宇澄霽。殘星耿耿。乃知爲溪聲。上程。有一川。爲梓川上流。渡川就山而左。廻。岩石

上文疑爲大  
雨至者順叙  
此則逆叙尤  
覺奇創

錯列。瀑從樹間瀉下。聲若風雨驟至。亦一佳景。休茶店。遇一翁從少年。問之。曰。赴松本。遂同行。抵稻扱。已午。喫飮。行二里。日鳴鳴。溪水分流。鳴喚出沒。越橋。沿厓而行。約半里。一崖皆石。巨瀑懸下。長數丈。折成數層。水勢激怒。飛沫如霧。日光映之。粲爛奪目。奇妙不可言狀。行十數町。山盡。眺矚漸濶。過波多村。左。眇連山起伏。一峰巉然戴雪者。爲吾鄉立山。轉折東行。一山當面。雲氣蓬勃。須臾滿天。雷聲四起。抵松本。雨。簌簌降。乃與同行翁俱宿。翁自言。曰。守田某。舟津人。真



朴可喜。共出游街市。夜色暗黑。萬燈輝映。頗足醫連日之勞。

二十一日。出旅館。觀市街。徘徊城址。臺池猶存。余初謂蕞爾小邑。不足觀。至此知其爲盛邑。守田欲出善光寺。余欲出諏訪。乃分路。南行三里。地漸上。顧瞻昨來所歷。已落雲煙間。至鹽尻嶺。上有一小祠。村人來集。問之。曰。祭御嶽神。問此地可望御嶽。曰。西南最遠。屹立雲表者。乃是。會天欲雨。急進。嶺窮臨一大谷。中有一簇白雲。形狀甚奇。視之。卽諏訪湖也。大呼稱快。

顧黑田生曰。吾常披覽圖經。略知湖山所在。今日來此。於御嶽。於諏訪湖。不知方位如何。古人所謂百聞不如一見。是也。黃昏。至下諏訪。有明神祠。祠後老杉數株。號爲神木。一拜而退。投中川姓家。引湯泉供客。名曰巴湯。主人曰。衰緒出今井四郎。因以巴名湯。二十二日。雨晴。南行數町。有明神祠。結構略同前日所見。抵上諏訪。右折。有公園。爲高嶋城址。雉堞高低。菱蓮滿池。游魚潑刺。度橋入堞中。花木鬱茂。西北隅得一埠。拾級而登。諏訪湖在其下。綠波蕩漾。山巒環

列爭獻奇秀。極爲佳矚。一碑刻三島中洲所撰記。東南行三四折。一路通群山間。坦平如砥。蓋近時所修。此爲甲信官道。車馬陸續不絕。抵葛驛。日且曛。乃宿。二十三日。晨行二里。抵菅原村。赤松列植。不知幾千樹。路通其間。會朝瞰射林。松影布地。如行苻藻中。沿流而南。山峰矗立。其嵯峨若攢劒者。爲八岳。崔巍戴雪者。爲駒岳。爲地藏岳。而富岳嶺。峯於雲表。概皆前日。在高嶋公園所望見。是日暑威如燬。晚宿甲府。飯後出觀市街。燈火張肆。頗似東都。舊稱小江都。良有

以也。

二十四日。微陰。穿隴畝。迤邐而行。訪武田氏遺蹤。一寺曰大泉寺。武田氏香火院也。一堂安信虎信玄勝賴塑像。左右小閣。一奉三日川戰死諸將土木主。一奉曾我氏木主。寺僧一一指示。且曰。五郎復讐。逃至此地。以壽歿。又指一墓。曰。曾我兄弟墓也。曾我氏之事。載在史乘。皆不稱以壽歿。而此寺所傳如此。未知信否。徑田畦北出。嶠嶂屏列。松樹成林。中有一碑。石柵繞之。題曰法性院大僧正機山信玄之墓。其陰刻

五郎處死吾  
妻鏡有明文  
口碑誕妄類  
如此

誌安永中沙門默愚應所撰曰機山天正元年癸酉四月十二日卒恐敵國聞知不發喪三年乙亥四月火化此亦異史乘所載西北數町得城址廣袤百餘間湟塹依然憑高而望甲府市街歷歷在一目之下南行四里所曰鯨澤買舟下富士川水流曲折勢極迅激西牌至身延身登山深谷幽有僧日蓮所創巨刹稱久遠寺登岸投宿旅舍則已昏黑不辨人唯遠聞諷經之聲與溪水之音相和也

二十五日早起觀久遠寺規模頗大躡磴而上堂殿

屹立金牒粲然行香者不絕踵下磴右折廻溪而進有一堂曰埋日蓮遺骨地左右皆墳墓七面山聳其背樹木鬱蒼山路羊腸爲半日程此日擬至駿河直歸旅舍束裝至富士川駕舟而下迅激曲折略如前日抵沼久保捨舟上岸披荊棘而進午時達大宮大宮在岳麓地拔海面若干近年製紙之業大開人家櫛比行旅不絕左側一祠曰淺間神社祀岳神宮殿宏壯老櫻數百株擁門之左右其背雜樹森蔚右側稍低一池可百畝蘋藻雜生西北隅構一小屋水潏

然自石罅出。掬飲之。清冷沁齒。蓋岳雪融釋。伏流石間。至此全涌。余嘗過岳麓。行程有期。不得登游。以爲平生之憾。及是登游之念勃然。黑田生亦欲一登。乃出祠攀岳。登二里。抵村山投宿。隣室有數十客。歌舞喧闐。日房給農民。每歲登岳者。夜半始散。

二十六日。蓐食。倩導夫而發。登二里。天漸明。顧望左右。渺茫無際。路傍有樹。枝葉繁鬱。其長概及人胸。導夫曰。是名黃蕘花。可以製紙。靜岡大宮。頓致富饒者。以有此木也。過此青草布地。曰龜芝。曰鶴芝。自山麓

望之。狀類鶴龜。故以命名。稍登。樹林莽蒼。仰不見曦景。峻岩橫路。曰駒返。上置八幡祠。從祠側而登。二里餘。曰一合。自此燒石磊砢。草木漸希疎。合本量名。邦俗筭一里以內曰幾合。高山自趾至巔。亦有合稱。獨富士自草木不生處以上。曰幾合。與它山別。每合疊石爲室。以供宿憇。至四合。一山突兀如贅。呼曰寶永山。寶永中噴火。一夜而起。愈登愈峻。至九合。已申牌。自村山至此。凡九里。石室左右相望。就左室而憇。寒氣沁骨。見汲池滌器物。少頃。水皆凍合。乃被綿袍。綿

袍紺色。大襟濶袖。長及膝。以山頂倏寒。導夫携之供客。少進石室南向。祀岳神。祠官居焉。祠背一大坑。週迴里餘。深可一里。崖上立華表。俯視坑中。有一方石。爲神所憑依。四邊隕隤如削。余與黑田生。猿懸而降。石極鬆脆。每步驕然崩。降數町。積雪爛然。恨坑底不可達。厓側處處見洞穴。往古所噴火。還華表側。導夫俟既久。沿坑而進。有池。曰子代池。清澈可鑑。池上一峰。嵯峨插天。曰三嶋嶽。一巨岩臨坑。似猛虎蹲踞。曰蹲虎。更進。至劔峰下。左側斷崖。渺不見其底。黑田生

投一石。殷殷轟轟。良久響歇。崖下適雲氣騰上。頃刻蔽半天。導夫云。晴日可望。信越諸山。曲折而行。一峰曰彌勒行場。側有一小洞。如月懸空中。既而至洞下。鑿石爲級。誤一步。輒爲粉壘者。匍匐過洞。左顧甲信山川湖沼。瞭然可數。進數町。一蹊通坑中。蹊窮得一泓。曰金明水。繞以柵。病眼者汲去。曰可以藥。更進石室十數。皆爲東北口。登者所宿。登岳凡四路。西南爲村山口。南爲湏山口。東爲湏走口。北爲吉田口。稍前。導夫指東方曰。岳影幻出。余始不爲異。熟視之。雲氣

滿谷如海波起伏。中隱然印岳影。其色上蒼下漸白。蓋落日倒射岳身。映蒸發氣。顯此象也。頗爲偉觀。進數百步。攀鐵梯。有一岩窟。藏冰雪。玲瓏洞徹。色如水晶。曰歲例取水獻宮內省。又數町。達前所憇石室。室深二間餘。潤倍之。主人岳麓中畑村人。每歲來此。以宿客爲業。枕簟衣衾。錡釜杯盤略具。每夜宿者數十人。此夜無客。重衾而寢。幽清淒寒。恍有身入廣寒宮之想。

二十七日。丑牌。出室觀日出。宿雲平布。四望茫茫。如

滄溟。少焉東方漸白。紅暉一發。海面變幻。乍紫乍紅。既而日遂出。閃爍不可注視。回顧西方宿雲未散。岳影印之。亦猶昨所見。左視右睨。自疑御飛龍而在乎玄間。寒氣四襲。殆不能堪。乃還室。余將經足柄嶺而東。問路所由。室主曰。東行半里。一崖燒石爲阪。曰湏走。瞬間達一合。但沙石破草鞋。非換五六草鞋則不可。喫飯而發。至湏走。一舉足。輒沙石崩墮。身隨之。飄飄乎。猶羽化飛去者。然至一合少休。更降數里。回視岳已帶煙靄。含笑立于空際。抵御殿場。就茶店午食。

御殿場。古昔源右將獵富士野。設營之處。八幡祠。即其營云。過竹下。路岐。左折爲新道。右折就故道。喬松森列。左右皆深溪。峰巒回繞。蒼翠如沐。西南隱隱隆起者。曰金時山。相傳阪田金時所生。抵矢倉澤。日方下春。覓旅亭宿。

二十八日。早發。過關下塚原諸村。左折度酒勺川。取路於田睦間。出國府津。壯丁數百。盛土於器而轉輸。築汽車道也。沿海東行。晚抵藤澤宿焉。是日炎赫如蒸。

二十九日。微雨。訪遊行寺。旁有一艸庵。護古墓。榜曰小栗滿重墓。滿重。據常陸小栗城叛。及城陷。走參河。子小二郎。取助潛匿相摸。一夜與從者俱宿某家。主人與群盜謀毒殺以奪寶貨。小二遁至藤澤道場。主僧憐之。使人護送參河事。詳鎌倉大草紙。庵所護者。恐小二之義墓。右折赴繪嶋。竹樹夾路。出沙濱。遠望孤嶋。浮波。岩石崔嵬。密樹叢生。不問知其爲繪嶋。舟至嶋口。阪路左右。樓屋層疊。上有辨天祠。陟降徘徊。居然如遊蓬壺。就來路。右轉沿海。抵腰越。路左一蕭寺。

日滿福寺。往時源義經所寓。今猶藏其訴寃書。所謂腰越書。踰極樂寺阪。一碑曰大館。又次郎源宗氏主。從十一人墓。碑陰曰元弘三年五月十九日戰死於此。宗氏後裔。越前大谷。後氏等所立。行半里許。左折一祠。祀鎌倉權五郎平景政。祠東古刹倚山。曰長谷寺。安觀音木像。長三丈。日與大和長谷寺像同製。東行詣鶴岡八幡祠。茶肆竝列。遊人旁午。祠宇宏麗可觀。藏古物珍器。更行路左。一邱有源右將及嶋津忠久大江廣元墓。右將一呼。天下響應。遂誅鋤平氏。開府于此者。雖由其才略。

超凡。且賴父祖餘烈。要亦二弟輔翼之力居多。而猜忌殘忍。後先殺二弟。詩云。喪亂既平。既安且寧。雖有兄弟。不如友生。右將之謂也。墳土未乾。家室亂滅。亦宜矣哉。行禾黍中數町。一祠扁華表。曰鎌倉宮。祀護良親王。就謁焉。祝導觀親王舊蹟。祠背有一土窟。窪然暗黑。不見其底。曰是親王遇幽處。距窟百步。瘦竹成林。曰是淵邊義博棄親王首處。自此數百步。一山頂有親王墓。仰觀頂上。松樹挿青霄。原路東進。岡巒列擁。即北條足利二氏第址。更進。鑿山爲隧。曰朝比



奈切通。寒風吹面。日光不到。出隧則豁然開。遙望海面。進二里。至金澤。人家錯落。鷄犬相聞。爲一勝地。將探橫須賀。至六浦灣。雇舟。海波蒼茫。清風四起。快不可言。薄晚。入橫須賀灣。望見巨艦集簇。舍舟投宿。三十日。早起。觀造船場。場在灣頭。巨屋長廠。縱橫排列。技手工夫。千百執工。鑿鑿之聲。磷磷之響。閤然雷轟。其械器之精良。機關之巧妙。神施鬼設。使人一見茫然。海灣大渠。修船艦之所。周若干步。以石砌之。其底漸隘。爲船腹狀。面海一方。以煉瓦爲大扉。以便船

艦出入。市街倚山面海。以其有造船場。四方來觀者。不絕踵。辰下。乘汽船發。此日快晴。甲板上顧眄。房相諸大山。一起一伏。如立屏障。南方則海波蒼蒼。極目無際。午時達橫濱。帆檣爲林。人蟻集于岸上。市街日盛。大異舊觀。黑田生訪一舊知。午後。上汽車至東京。遙拜 皇城。抵本鄉大谷氏。時舊門生大場由寓焉。倒屣出迎。宴談至夜半。

三十一日。詣阪本街邸。謁涉園公。同利詣金杉邸。謁霽山公。利公爲涉園公尊父。外出。涉園公以寒疾在蓐。

不得相見過午。訪龜谷省軒。行省軒嘗在史館。有令名。余文書訂交。至此始見。省軒優遇。及辭去。贈著書數種。

八月一日。馳車訪岡鹿門。家人曰。鹿門去月游靜岡。不日歸京。搜芝愛宕諸勝。

二日。見松平墨陽公。公涉園公弟。幼爲廐橋侯所養。肩松平氏。其在富山藩。余爲替御。日夜在左右。頗受寵遇。將命者云。公數月來。患脚疾。謝客。公見名刺。力疾延見。禮意優渥。共語今昔。悲喜交至。申下拜辭。

公命從者。隨車送歸。

三日。訪鹿門。曰。昨歸。延小齋。置酒割鮮。鹿門氣宇高邁。中年以後。絕意官途。以著書爲事。其論古今。皆強人意者。午下辭去。訪蒲生裝亭。款話移晷。訪三嶋中洲。教。曰游熱海溫泉。

四日。訪鈴木暘谷。年。暘谷精通系譜。余久聞其名。此日始見。晤語數刻。午下還寓。

五日。訪嶋田篁村。不在。訪小山春山。弘朝。談話少時。會一客來訪。辭去。返寓接涉園公使。謝前日過訪。且

贈物。

六日。不破光房。飯森遐年。僧盛學來。皆嘗從余學。遐年今在日下部。鳴鶴作東塾。學書傍讀書。余與鳴鶴岩谷一六修相識。遐年云。鳴鶴一六皆浴某溫泉。時方大暑。都下知舊。出游避暑。在家者少。假期漸迫。將以明日發途。游日光山。裝行李。

七日。晴。上野停車場。辭送客。乘車。達下毛宇都宮。已晡。宇都宮。舊戶田侯所城。市廛相望。殷富冠此間。降車就日光道。巨杉夾道。青翠迫人。不覺暑熱。黃昏。抵

德二郎宿。會村社祭。絲竹嘔啞之聲。終夜喧闐。

八日。陰。街上往往老幼異服。昇山車。弄鼓笛。大慰旅懷。稍前。嶠嶂掠面而起。白雲斷續。此爲日光山。午下。抵鉢石。自宇都宮。巨杉夾道。皆慶安中所植。旅館更裝。往觀東照廟。出鉢石得一川。曰大谷川。水激岩石。澎湃有聲。架二橋。一曰山菅橋。不用柱礎。丹漆塗之。兩口設柵。遏往來。曰此爲將軍拜廟架者。翠木蔭蒼。地勢隆起。右折上磴。入石表有門。曰表門。付券門。監入觀。經陽明唐門。二門至拜殿。右一逕爲墓道。規模

之雄。殿堂之偉。實海內巨觀。導者一一指示解說。皆具於記志。不敢記。

九日開霽。早觀猷廟。雖華麗不及照廟。規制略同。議者曰。德川氏起日光廟。使海內諸侯獻賞就役者。欲藉以察意志所存。兼殫耗國力。不敢謀異舉也。此言雖不中不遠。假仁義而成事。霸者之常道耳。還館束裝。傍大谷川而西。一溪循厓而迂回。得一龕。三面石壁。有瀑下垂。正面曰觀背。右曰白絲。左曰相生。觀背尤壯。怒噴直下。響如萬雷。緣厓腹。出瀑背。飛沫噴揚。

狀華嚴之奇  
不費多筆妙

使人眩視。更進至山巔。有小祠。一水奔流。即瀑源。循舊逕而下。右折深林。徑路欹側。泥濘沒鞋。抵馬廻村。時已午。就旗亭一餐。復行里餘。踰一山。左折。碑刻小野湖山華嚴瀑歌。知華嚴瀑近。忽聽百雷轟然。降厓數十步。徑窮。瀑懸厓壁。俯視窈然。不知幾百尺。有一岩。若怪物潛伏。窺人。瀑怒擊。飛舞跳躍。亂沫濛濛。仰看。岩壁皴蹙。層層成色。壁罅洩水。濺灑如挂白絲。不覺稱快。厓上右折行數町。大湖渺然。人家成村。路傍有二荒神祠。舊稱中禪寺。祠背巉然。聳碧空。曰二荒。

山。二荒本訓讀。其不多。後人音讀用日光字。又合字作晃。路沿湖。雜樹交陰。涼氣洒然。屈曲行林中。涉溪流而上。得平原。曰赤沼。里餘。一小湖。夕陽蕩射。波光激盪。山影映之。極有佳致。稍前。屋宇相望。曰湯本。以溫泉著。比屋館浴客。予投佐野氏。屋主概皆鉢石人。每歲夏秋。來此開澡泉云。

十日。曉起推窓。望一高峰。曰白根。有前後二山。總稱白根。高出二荒山上。乃擬登白根。經金精嶺。出上毛沼田。南行半里。左側立華表。即白根登口。箭鏑沒人。

白根登陟為  
此游第一故  
文字亦尤俊  
偉可觀

無復行徑。行半里。涉溪水。就一山。僅認人跡。山甚峻。左右屈曲。或援樹根而登。遂達前白根。山上焦石。無一草木。稍前。隔大谷。有一兀山。屹立。此為後白根。小休。降谷底。抵後白根下。仰視山勢峻。嶄。銳。如植圭石。芒峭發。無手足可措。蝸坩。達頂上。有小祠。安銅神。祠側。土石。拆裂。無數。洞穴。噴火。吐煙。不可得而近。佇立四顧。層巒重嶺。白雲吞吐。狀如怒濤。而富岳巍然峙。東南。猶與茲山揖讓者。東北一峰。兀立。為二荒山。呼而欲應。余與黑田生。相顧恍然。如有所失者。天風冷。

取友亦豪

冷不可久駐。乃割愛而降。此間地勢本一山。噴火破裂時。為前後二山也。二山間有池。湛碧帶硫氣。取原路抵華表下。已午。左折迂登。達一峰巔。即金精嶺。踰嶺進數町。檜柏森然。蕩篠翳路。友人保田廣太郎。四後嘗過此。有一熊逼伴行人。出死力而救。遂斃之。回想當時。不覺凜然。左側一泉。全出石罅。掬飲甘而冽。此為利根川源。從是一步低一步。晚抵東小川村。郡利根有溫泉。家家設槽蓄泉。投一茅屋。向所全出之。泉合諸溪水。至此稍大。繞屋而奔。竟夜淅淅撼枕。以

耳與溪聲熟。不復覺其喧。

十一日。行一里。沿道多赤松。左右岡巒。經須賀川。平川諸村。踰一山。架橋。橋板距水面二十間。水色沈碧。兩岸奇巖列峙。赤松覆巖上。風自水面起。蟬聲如雨。快甚。陟降三里。至一山巔。西望沃野千里。村落棊布。景致絕佳。行二里。抵沼田。居民稠衆。會里社奠祭。神輿巡街。老幼雜遝。絃歌沸湧。邑西有古城址。即真田氏所居。降一阪。始獲平地。一望開豁。稻杭如雲。回顧所經山岳。皆在雲煙間。南進。達高崎。為赴越中官道。

予欲探越後諸勝。乃右折西進。入夜宿上牧。  
十二日。抵小日向。左側岩石迫蹙。樹木膠轉。水流中間。幽趣可愛。里許。抵大穴村。一川架石橋。四面皆山。如行畫圖中。右折入山。徑小。僅容行人。樛木交加。仰不見日影。迂回登坂。忽得平巔。有一綫路繞山腹。爲毛越間新道。一茶店。前隔深壑。望峻嶺。曰笠岳。小逕連嶺。傳爲上杉謙信出兵八州。創開此路。其南一山如劔戟。曰大寶岳。抵井坪。舊道降谷。雜樹蒙密。曰兔平。三里許得一村。至此山盡。路始坦。是夜抵越後六

日町宿。

十三日。陰。有一水下注信濃川。乘小舸抵日出。上岸午食。改乘一船有篷者。從此川流漸大。右望山峰。巉削如筆架。曰駒嶽。曰八海山。比至妙見。眼界頗開豁。遙見彌彥特立。東南諸山。方帶夕陽。紫翠稠疊。有畫致。一長橋。長二百五十間曰長生橋。近歲所架。過橋登岸。則爲長岡。暝色四合。街燈如星。投宿旅店。  
十四日。曉。乘小舟。達汽船。水煙始斂。日出山端。極爽快。汽笛發船。時見舟張白帆。遡上流。川身漸廣。覺近

海忽遇長橋臥波長可五百間曰萬歲橋橋西萬家  
隱見此爲新潟嘗聞新潟五港之一舟車輻湊貨物  
匯聚登岸徘徊市街頗覺寂寞不愜所聞盛衰之變  
易令人感慨本擬抵新潟小留至此意興索然乃南  
行抵內野宿自新潟至內野大抵沙路

十五日微雨西南行五里抵彌彥驛人烟稠密彌彥  
神社北越大社祀天香山命傳言崇神天皇馭宇創  
建此日修祀事賽者四至往來絡繹驛南有山即彌  
彥山分爲二峰東者稱多寶西者稱香語沿海行數

里海中一帶如蚯蚓者佐渡也越後沿海皆望佐渡  
而此地距離最近稍進一市邑曰出雲崎日已逼虞  
淵遂宿

十六日早發抵椎谷望越中諸山縹緲于海上一山  
當路曰米山登降數里山始盡史稱上杉謙信上米  
山瞰視府內曰吾他日起兵復國必陣于此可以知  
爲險要地也維新後開新道便往來唯山勢循海灣  
蜿蜒起伏道傍無樹木蔽蔭夏日旅行炎暑燠赫頗  
覺困苦夜宿鉢崎



十七日。擬乘直江津汽船。航越中岩瀨港。秉燭而行。曙色漸開。平野渺茫。與海爭闊。妙香蓮華諸山。出沒乎煙雲杳靄中。進數里。有一澳灣。帆檣參差。屋室如鱗。爲直江津。時猶早。歇茶店。問汽船。曰。汽船唯一隻。昨往越中未還。余失望。意謂徒在旅舍。不如從陸而往。拂袂而起。至五智。古刹曰國分寺。天平中。僧行基所創。堂置彌陀釋迦大日藥師多寶五如來。地名五智。以此沿海而西。爲赴越中官道。行數里。抵能生。時已過午。是日。過申日蝕。我邦越後直江津。及磐城白

河。當皆既之綫。天學者自西洋諸國而來觀云。乃憇茶店。盛水於槃。置庭上。將申。天色翳翳。臨槃視日影。印水。須臾日蝕。僅餘一綫光。回視海面晦冥。咫尺不辨。老幼點燭。稱佛名。不敢出門。既而明漸復。此地直江津西。綫路不甚差。故晦冥至此。傍晚雨至。宿絲魚川。

十八日。雨。襜褕而發。里許。有大河。曰姬河。新建板橋。逾橋數里。山勢峻嶒。海波欲齧山脚。白碧重疊。此間在昔稱父不知。子不知。行旅踏沙石。超波浪而過。往

東瀛日錄  
往爲波浪所捲去。今也道在山腹。蹄輪駢通。余此行  
凡數百里。到處皆有新道。往來甚便。聖朝利民之  
大。可概知。自是折旋下山。與海漸離。一川曰界川。爲  
越後越中界。抵三日市。午食。黑田生。欲訪友村中。乃  
別。歸家已上燈矣。黑田生。四瀉人。資性順良。嗜學不  
倦。聞余戒行。齋父書來請從游。余甚嘉其意。乃記游  
之梗概爲二。一以自置案頭。一以貽生生時。閱覽想  
山川流峙。以養志。思羈旅苦樂。以勵行。亦爲講學之  
一助也。

醉曰重野  
先生評此  
記蓋在癸  
巳未深時  
先生未故  
知家嚴故  
其讀家嚴  
文亦不三  
記行二三  
篇耳

敬止文。余未多見。讀記行二三篇。簡練老熟。使余  
輩瞠若。蓋敬止富濟勝具。故尤長紀勝文。如此  
篇。既窮富山顛。又攀極白根。在他人得其一。將夸  
張極口。連篇累牘不止。敬止乃輕輕叙去。如  
視以爲尋常者。然脚力筆力。共在二十分之外。

重野安繹拜評

古來記游之作。以柳爲最。喜其筆情峭拔。紆曲形  
容盡致。能肖其狀。此記於所涉所見。爲山爲海。爲  
村落爲寺觀。爲古蹟名勝。凡程途崎嶇。煙波浩蕩。

無不歷歷摹寫。令人一讀如親涉其地。目見其形。可稱柳州再出。洵為佳構。勸

君付刊以公同好。

乙巳秋九。漆園老人王治本。讀於浮城旅舍

并識。

明治四十五年七月五日印刷  
明治四十五年七月十日發行

(非賣品)

著者 小杉 熙

富山縣富山市清水町七拾番地

發行者 玉井 義信

富山縣富山市四十四番町四拾番地


印刷者 澤田 助太郎


石川縣金澤市高岡町九拾番地

印刷所 明治印刷株式會社

石川縣金澤市高岡町九拾番地







東  
游  
日  
録

022720-000-3

249-113

東游日録

小杉 熙/著

M45

ADB-0503

